
ХАЙРУЛЛО БОЗАРОВ: БЕКТЕМИРНИНГ ҲАР БИР ҒАЛАБАСИ ЁШЛАРИМИЗГА ИБРАТДИР!

Бокс бўйича Осиё чемпиони, Рио олимпиадаси кумуш медал соҳиби, жаҳон чемпионати совриндори Бектемир Мелиқўзиев Фарғона фарзанди. Айни дамда фаолиятини профессионал боксда давом эттираётган бу спортчининг ҳар бир ютуғидан фарғоналиклар доимо фахрланишади.

Фарғона вилояти ҳокими Хайрулло Бозаров WBO Intercontinental камари соҳиби Бектемир Мелиқўзиевни олтинчи ғалабаси билан табриклади.

Вилоят ҳокими боксчининг профессионал бокснинг супер ўрта вазн тоифасида эришган ғалабалари, спортдаги ютуқларини алоҳида эътироф этиб, эсдалик совғаларини топширди.

- Спорт нафақат соғлиқ гарови, балки мамлакатни дунёга танитувчи тинчлик элчиси ҳамдир. Спорт ва жисмоний тарбия билан шуғулланган фарзандларимиз ҳар томонлама соғлом ва комил инсонлар бўлиб етишишига ҳеч қандай шубҳа қолмайди. Бектемирнинг ҳар бир ғалабаси Президентимиз томонидан бу соҳага бўлган эътибор ва ғамхўрликка жавоб бўлса, иккинчи томондан ёшларимизга ибрат мактаби бўлиши муқаррар, - деди вилоят ҳокими.

Бектемир Мелиқўзиев 30 октябрь куни Индио шаҳрида (Калифорния, АҚШ) бўлиб ўтган бокс шоуси доирасида WBO Inter Continental камари учун жангга тушди.

24 ёшли Бектемир Мелиқўзиев учинчи даврада мексикалик Алан Кемпни мағлуб этди. Иккинчи раундда ўзбекистонлик боксчи рақибини икки марта йиқитди, учинчисида ҳам мексикалик боксчи нокдаунга учраганидан сўнг ҳакам жангни тўхтатди.

Шу тариқа Б.Мелиқўзиев профессионал боксдаги олтинчи ғалабасини нишонлади. Б.Мелиқўзиев ушбу ғалабаси орқали WBO Intercontinental камарига эга чиқди.

Ҳамюртимизни бу катта ғалабаси билан муборакбод этамиз.

Фарғона вилояти ҳокимлиги

2020-11-23 19:39:40